

*Менгес Алламбергенов*

# ҚАДИМИЙ МУДОФАА ҚҮРҒОНЛАРИ

---



Алишер Навоий номидаги  
Ўзбекистон Миллий кутубхонаси нашриёти  
Тошкент — 2007

**Тақризчилар:**

Хайриддин ХЎЖАНИЁЗОВ, тарих фанлар номзоди, ЎзФА Қорақалпоғистон Республикаси бўлимининг тарих, археология ва этнография институти бўлими бошлиғи.


Самандар ИСМОИЛОВ, тарих ўқитувчisi.

Мазкур рисолада қадимий Хоразм давлати заминида (ҳозирги Қорақалпоғистон Республикасининг Элликқалъа тумани ҳудудида) илк ўрта ва ўрта асрлар даврида қурилган кўхна қалъалар, тарихий обидалар ҳақида ҳикоя қилинади.

Муаллиф ўзи тўплаган тарихий маълумотлар ҳамда археологик тадқиқотлар асосидага манбаларга суюниб, қадимий Ипак йўли бўйида бунёд этилган, стратегик жиҳатдан мудофаага мўлжалланган қадимий қалъалар ва қўргонлар ҳақида қисқача, қизиқарли тарихий маълумотлар беришга интилган.

Амударёнинг ўнг соҳили ҳудудида жойлашган, минг йиллар давомида ҳаёт гуллаб-яшнаган юзлаб қадимий қурдатли қалъалар, уларда истиқомат қилган аждодларимиз — ота-боболаримиз ўз мустақиллигини сақлаб қолишига интилиб, мудофаа ишларида катта ҳарбий кучга эга бош-қарув тизимини яратганликлари аниқ мисолларда ифодалаб берилган.

Рисола тарих фани ўқитувчилари учун фойдаладан холи бўлмай, ундан ёшларни ватанпарварлик рухида тарбиялаш, авлод-аждодларимизнинг ҳаёти, маданияти ва тарихи билан тўлароқ таништиришда фойдаланиш мумкин.



© Алишер  
Навоий номидаги  
Ўзбекистон Миллий  
кутубхонаси нашриёти,  
2007 йил.



*Бизнинг мамлакатимиз, ҳалқимиз күхна Хоразм заминида «Авесто» пайдо бўлган замонлардан буён ўз ҳаёти, ўз маданияти, ўз тарихи билан яшаб келади.*

Ислом Каримов

## АЖДОДЛАР МЕРОСИ – КЕЛГУСИ АВЛОДГА

Элликқалъя — жуда кўплаб тарихий қалъалар ва иншоотларни багрига олган мўъжизавий замин. Биз қадимий обидаларга бой жойда истиқомат қиласми. Бундай бахт ҳаммага ҳам насиб қиласвермайди. Зоро, Элликқалъя туманимизни “очиқ осмон остидаги музей” дейишса ҳеч қандай муболага бўлмайди.

Бунинг боиси, қадимий қалъаларга эга ушбу гўшада бугун тарихий обидалар билан бўйлаша оладиган эллик биринчи қалъя — мўъжазгина Бўстон шаҳри қад ростлади. Эндигина 30 баҳорни қаршилаган туманимиз бутун дунёдан ташриф буоряётган сайдёхларни, сармоядорларни, ижодкор ва санъаткорларни, сиёсат арбобларини кутиб олмоқда, ўз тарихи ва чақмоқдай ярқ этган бўгунги гўзал жамоли билан ҳаммани ҳайратга солмоқда.

Юртимизга бир марта келган меҳмон қалбида ажиб ҳис тууб, улкан таассуротлар билан қайтиши аниқ! Негаки, бир томонда навқирон йигитдай кўркам ва баркамол янги шаҳар турса, иккинчи томонда ўз багрига қанча сир-у синоатларни яшириб, салобат тўкиб турган қалъалар намоён бўлади...

Буюк илак йўли бўйида жойлашган бу қалъаларнинг ҳар бири ўнлаб асрларнинг суронли тўфонларини бошидан кечирган, аждодларимизнинг тарихидан сўзловчи “тирик” гувоҳ.

Тарихини билмаган элнинг келажаги йўқ, дейди донишманлар. Шу элда яшайдиган, Ватанини севадиган ҳар бир киши, бу қалъаларнинг тарихидан боҳабар бўлиши лозим ва уларни келгуси авлодга етказиш учун масъул саналади. Шу ўринда Менгес Алламбергенов жуда ҳайрли ишга қўл урган. Унинг «Қадимий мудофаа қўрғонлари» деб номланган мазкур илмий-оммабоп рисоласи ана шу мақсад йўлидаги илк қадам бўлганлигини таъкидлаш лозим.

Тумандаги тарихий ёдгорликларнинг қайси даврларда ва кимлар томонидан бунёд этилгани ҳақида машҳур рус археолог-олими С. П. Толстовнинг «Қадимги Хоразм» деб номланган китобида батафсил баён этилган. М. Алламбергенов эса қўлимиздаги мазкур рисолада Тупроққалъя, Аёзқалъя, Гулдурсунқалъя каби ёдгорликларнинг мустаҳкам мудофаа истеҳкомлари бўлганлиги, уларнинг қурилиш услуби, сув иншоотлари ҳақида асосли фикрлар билдиради.

“... ҳар бир қаср баланд деворлар билан ўралган мудофаа иншоотларини эслатиб, ўша даврда аҳоли қандайдир ҳарбий ҳавф остида яшаганинги кўрсатади,” деб таъкидлайди муаллиф. Рисолада Аёзқалья, Гулдурсинқалья, Қирқизқальялар ўртасида мустаҳкам сув иншоотлари ва ер ости йўллари бўлганлиги ҳақидаги маълумотларни ўқибоқ, бу ергаги аҳолининг деҳқончилик билан шуғуллангани ва ҳар бир қалъада муҳофаза иншоотлари қурилгани дикқатингизни тортади.

“...Қизилқалья муҳим стратегик пункт бўлиб, у хоразмшоҳлар қароргоҳи — Тупроққальяни Амударё томонидан қўриқлаб турган.

... Кенг саҳро ўртасида баландга кўтарилиб турган Аёз-1 ҳам Қизилқалья сингари Хоразмга шимолдан борадиган йўл устидаги муҳим стратегик иншоот ҳисобланади”, — деб уқтиради рисола муаллифи.

Хоразм давлати ҳудудида иқтисодий ва сиёсий жиҳатдан бир-бирига даҳлсиз қатор ҳокимликлар бўлганлиги ҳақида фикр юритилади. Тупроққальядан топилган муҳим топилдиқлардан бири — бошига тож кийиб, қўлида бургут ушлаган кишининг ҳайкалчаси ва Аёзқальядан топилган ҳудди шундай сурат билан зарб қилинган танга бу ерда ўзига хос маҳаллий ҳокимият мавжуд бўлганидан далолат беради, дейилади китобчада.

Бу қалъалар биз яшा�ётган ушбу ҳудудда I—IV асрларда жуда ривожланган Хоразм давлати ҳукм сурганидан гувоҳлик бериб турибди. Рисолада бу давлатдаги аҳолининг ўз мустақиллигини қандай ҳимоя қилганини, оғир кўл меҳнатига қарамай мустаҳкам мудофаа иншоотлари кургани ва маҳсус лашкарлар тинч меҳнат кишиларининг осойишталигини таъминлагани тўлақонли эътироф этилади. Сув иншоотларининг муҳофазаси ҳақида ҳам кенг, асосли фикрлар юритилганки, буларнинг барчаси Хоразм давлати аҳолисининг тинч ва осойишта умр кечиришига, деҳқончилик ва чорвачиликнинг ривожланишига хизмат қилган.

Аждодларимизнинг ўз Ватанига, ҳалқига бўлган меҳр-муҳаббати, мустақилликни авайлаб-асраш борасидаги фидойилклари қаламга олинган бу рисолани мутолаа қиласан ҳар бир ўқувчи ота-боболаримизнинг асрлар оша мустақилликка бўлган интилишини ҳис этади ва уни авайлаб-асраш нақадар муҳим эканлигига яна бир бор ишонч ҳосил қиласди.

Ўйлаймизки, муаллиф савоб ишга кўл урган. Тарихий обидаларни ўрганиш борасидаги изланишларини давом эттиради, деган умиддамиз. Зоро, шу заминда яшаб, ижод этаётган ҳар бир киши бу муҳим тарихни келажак авлодга етказиш учун масъулдир.

**Зулайҳо НУРМЕТОВА,**  
*Ўзбекистон Ёзувчilar уюшмаси аъзоси,*  
*Қорақалпогистонда хизмат кўрсатган журналист.*



## ҚУДРАТЛИ ҚЎРҒОНЛАР ДАВЛАТИ

Тупроққалъалардан келар товушинг,  
Товушларинг келар Элликқалъадан.  
Мен ҳам бир қўрғондай кетгум қоришиб,  
Улуғ қўрғонлардан яралган Ватан!

Сирожиддин САЙИД,  
Ўзбекистон халқ шоири.

Ҳозирги Элликқалъанинг узоқ тарихига оид маконлар, мудофаа қўрғонлари ва эски қалъаларда археолог-тариҳчи олимлар томонидан олиб борилган изланишлар ва қазиш ишлари натижаси бу ҳудуд тарихининг нақадар бой эканлигини кўрсатади.

Археолог-олим С.П.Толстов «Қадимги Хоразм» номли ажойиб асарининг «Кангюй отлиқлари» деган бобида отлиқ аскар қурол-яроглари ва тактикаси Хоразм воҳаси аҳолиси билан сак-мас-сагетлар алоқа қилган, улар бир жойдан чиқсан бўлиши мумкин, деган фикрни уйғотади дейди. Кейинчалик олим Хоразмнинг антик давр охиридаги (Тупроққалъа) ва илк ўрта асрдаги қурол-аслаҳалари, қадимиy сүфднинг ҳарбий анжомлари сингари апасиақ отлиқ аскарлари қурол-аслаҳалари билан узвий боғлиқлигини исботлаб берган. Бу исбот асосида Хоразм давлати қўшинлари бир қанча оралиқ воситалар орқали Европада ўрта асрларда мавжуд бўлган қуроланиш тури ва тактикаси ҳамда рицарликнинг пайдо бўлиши учун намуна бўлмаганмикин, деган ҳақли савол туғилади.

Эрамиздан аввалги IV—I асрлар қадимги Хоразмнинг



гуллаб-яшнаган даври бўлиб, бу пайтга оид ёдгорликлар жуда ҳам кўп ва хилма-хилдир. Хоразмнинг антик даврдаги шаҳарларининг деярли барчаси воҳани даштдаги қўшни қабилалардан мудофаа қилиш мақсадида қурилган. Амударёнинг ўнг томонида шарқдан гарбга қараб кетма-кет чўзилган Кангқалъа, Жанбасқалъа, Бозорқалъа, Кўрошинқалъа, Қирқиз, Аёзқалъа, Бўрлиқалъа ва Тупроққалъа сугориш иншоотларининг этагида бир-бирларига яқин ва қатор қилиб қурилган. Бир режага асосланган мудофаа тизими ва тараққий қилган зўр сугориш иншоотларининг мавжудлиги Хоразмнинг қудратли марказлашган давлат бўлғанлигини кўрсатади.

Хоразм экспедицияси аъзолари Хоразм подшоҳларининг қароргоҳи ҳисобланган Тупроққалъа ҳаробаларидан ва унинг теварагидан, Норинжон ва Бургутқалъа атрофларидан, шунингдек уларга яқин қасрлардан, Анқақалъа, Катта Гулдурсун, Желдикқалъа, Аёзқалъа каби ҳаробалардан дастлабки йиллардаёқ мингдан ортиқ танга нусхаларини, асосан мис тангаларини топганлар. Маълумки, асли танга-чақа зарб қилиш нафақат давлатчилик ривожланган, балки муайян давлатнинг мустақил эканлигидан далолат беради.

Тупроққалъадан топилган тангаларда айрим подшоларнинг ёки афсонавий қаҳрамонларнинг сурати зарб қилиниши ҳам бу ерда ўзининг ички ва ташқи сиёсатини олиб борган қудратли давлат тузуми мавжудлигини тасдиқлади. Ҳатто қўпчилик тангалар муайян тамгаларга эга эканлигини инобатга олсак, бу давлатда нафақат мустабид подшолар, балки айрим ҳукмдорлар мустақил ижтимоий-иқтисодий сиёsat олиб борган бўлса ажаб эмас.

Кушан империяси даврида ҳам илгаргидек сугориш тармоқлари ривожланади ва такомиллашади, эски қалъалар қайта қурилади, янги қалъалар ва аҳоли яшайдиган пунктлар вужудга келади. Янги пайдо бўлган катта сугориш иншоотларидан Қирқиз ва Тупроққалъа каналларини айтиб ўтиш лозим. Воҳа чеккаларида Кушан даври учун ўзига хос бўлган мудофаа иншоотлари барпо қилинган. Қуий Чарманёпда Говурқалъа, Устюрт қирларида Девкесанқалъа бунёд этилади. Суфориш тармоқларининг ривожланиши натижасида Аёзқалъа, Кўрошинқалъа, Тупроққалъа, Катта Гулдурсун, Кичик Қирқиз каби яхши мустаҳкамланган шаҳар ва қалъалар пайдо бўлади.

Бу ёдгорликларнинг ичиди Катта Гулдурсун, Қизилқалъа, Аёзқалъа, Говурқалъа, Анқақалъа ва ажойиб тарихий хазина бўлган хоразмшоҳлар қароргоҳи — Тупроққалъа алоҳида диққатга сазовордир.

Антик Хоразм давлатининг илк пойтахти ҳисобланган мазкур обида ва унинг теварагидаги ёдгорликлар тўғрисида батафсил тўхтаб ўтиш зарур. Катта Гулдурсун найзасимон шинакли қўшдевор билан ўралган нотўғри тўртбурчак (280—230 м.) шаклидаги зўр истеҳком бўлиб, у иккита катта сув иншооти — Қирққиз ва Тупроққалъя каналларининг бир-биридан ажralган жойида қурилган. Ички ҳовлида илк Кушан нусхасидаги қизил лойдан ишланган сополлар ва катта иморатларнинг қолдиги бор. Қалъя яқинида қазилган катта сув иншооти Норинжон шаҳри орқали ўтиб, Тупроққалъяга боради ва Қизилқалъя истеҳкоми олд қисмида тугайди. Мана шу зўр сув иншоотларининг бош қисмини мудофаа құлувчи ва сув тақсимлаш ишларини бошқарувчи марказий идора Гулдурсунқалъядада бўлганилиги эҳтимолдан ҳоли эмас. Бу канал ва шоҳобчаларнинг қуий оқимларини Қизилқалъя, Аёзқалъя ва бошқа қалъалар қўриқлаган. Булар ичida Қизилқалъя илк Кушан даврида баланд гишт пойдевор устига қурилган анча қудратли истеҳком бўлиб, ундаги бинолар каттагина чегара соқчилигини олиб борган ҳарбий гарнizon учун мўлжалланган. Қалъанинг ички қисмига ёппасига равоқли йўлаксимон бинолар қурилган. Қизилқалъя муҳим стратегик пункт бўлиб, у хоразмшоҳлар қароргоҳи — Тупроққалъяни қадимги йўл орқали ҳамда Амударё томондан келадиган ёвлардан қўриқлаб турган.

Аёзқалъя ёдгорлиги кичик девор билан ўралган. Султон Увайс тоғининг шарқий этагидаги деҳқонларнинг йирик қўрғонларидан иборат. Эҳтимол,

қўрғон ичida боғ ва по-  
лизлар мавжуд  
бўлган. Бу ерда-



Тупроққалъядаги  
хоразмшоҳлар резиденцияси

ги жуда кўп деҳқон қўрғонларининг орасида учтаси алоҳида ажратиб туради. Аёзқалъя қоясининг тепасини безаб турган Аёз-І деб аталган истеҳком ярим доира шаклидаги буржли баланд қўшдеворлар билан ўраб олинган. Қалъя бурчакларида икки буржнинг бир-бирига қўшилган «қалдирғоч думига» ўхаш шакл ҳосил бўлади. Бундай меъморчилик усулини фақат илк кушанлар даврида қадимги Хоразмнинг ҳарбий истеҳком қурувчи усталари қўллаган. Кенг саҳро ўтрасида баландга кўтарилиб турган Аёз-І ҳам Қизилқалъя каби Хоразмга шимолдан олиб борадиган йўл устидаги муҳим стратегик иншоот ҳисобланади.

Хоразм давлати ҳудудида иқтисодий ва сиёсий жиҳатдан мустақил бўлиб олган бир қатор ҳокимликлар вужудга келади. Тупроққалъя саройи залларининг бирида бошига тож кийган ва қулига бургут ушлаган подшо ҳайкалиниң топилиши, шунингдек Анқақалъя яқинида ҳам бошида тож, қўлида бургут ушлаган киши сурати солинган танганинг топилиши, бу тангаларнинг шу жойда зарб этилганлиги — маҳаллий сулола ҳокимиияти ўрнатилганлигидан далолат беради.

Тупроққалъя ўзининг тузилиши, деворлари ва ундаги шинаклар, у ердаги хоналарнинг қурилиши ва мудофаа тизими билан антик даврдаги катта шаҳарларга ўхшаб кетади. Лекин у ўзининг ажойиб санъат бойлиги билан алоҳида ўрин тутади. Буюк хоразмшоҳларнинг илк пойтахти бўлган бу ажойиб тарихий обида Султон Увайс тоғининг жануброғида, қадимий қалъалар ҳудудида жойлашган. Бу тилсим қалъя ҳаробалари 17,5 гектар майдонни (500x350 метрни) ишғол этади. Қўринишдан тўғри бурчак шаклидаги Тупроққалъя шимолдан жанубга чўзилган бўлиб, атрофи катта ҳом фиштлардан қурилган қалин ва баланд девор билан ўралган. Деворлар бўйлаб квадрат шаклидаги жуда кўп буржлар қад кўтариб туради. Қалъанинг шимолий-гарбидаги эни ҳам, бўйи ҳам 180 метр келадиган икки қават қилиб қурилган ҳашаматли сарой ҳаробалари кўзга ташланиб туради. Сарой ўз атрофидаги барча мудофаа иншоотлари билан биргаликда қисқа вақтда барпо этилган. Саройни душмандан мудофаа қилиш мақсадида ҳар бири 25 метр келадиган учта минора қурилган. Шаҳар атрофи ҳар 30—40 метрда квадрат шаклидаги минораси бўлган икки километрли девор билан ўраб олинган. Шунингдек, шаҳарнинг бош дарвозаларини қўриқлаш учун баландлиги 10—12 метр бўлган махсус йирик истеҳкомлар барпо этилган.


Шаҳарнинг жануб томонидаги бош дарвозасидан ичкарига кирилган заҳоти тўғри бурчакли қилиб қурилган уйга дуч келинади.

Афтидан, бу шаҳар соқчилари турган жой бўлса керак. Шу уйдан марказий кўча бошланади. Ўн метр кенглиқдаги бу кўча тўғри ҳукмдорнинг саройига ва шаҳар ибодатхонасига олиб кирадиган дарвозага бориб тақалади. Шу кўчанинг охиридан ўнгга қараб кетган яна бир кўча бозорга олиб чиқади. Бош кўчанинг ҳар томонида бир-бирига тўғри келадиган тор кўчаларда 9—10 тадан қаторлаб кўп хонали катта уйлар қурилган. Қалъанинг ички меъморчилиги Жанбас-қалъага ўхшаб кетади.

Ана шундай тор кўчалар ўртасидаги ҳовли-жойлар бир-бирига тулашиб кетган бўлиб, улар орасида девор йўқдай кўринади. Туташ ҳовлилардаги хоналарнинг сони 200 тагача етади. Бу нарса Тупроқ-қалъада истиқомат қилган аҳоли уруг-аймоқ бўлиб, авлодма-авлод яшаганлигидан ва ижтимоий ҳаётнинг қадимги шаклига мансуб бўлганлигидан далолат беради.

Ҳукмдор саройининг жанубий дарвозасидан бошланадиган узун йўлакнинг охирида ўт ибодатхонаси жойлашган. Ибодатхона бир неча иншоотлардан ташкил топган. Иншоотларнинг ўртасида қўш деворлар билан ўралган ва ичкарига айланма йўлаги бўлган тўғри бурчакли бино туради. Қадимий хоразмликлар ибодат қилган сўнмас ўт шу бинода сақланган.

Ўт ибодатхонаси билан ёнма-ён икки қават қилиб ишланган, уч бурчакли ажойиб бино ўзининг ҳашаматли кўриниши билан кишини ҳайратда қолдиради. Бинонинг юқори қисмидаги девор ганчдан



ишланган чиройли ҳайкалчалар билан безатилган. Сарой ва ибодатхона қурилишлари жанубий ҳамда шарқий тарафдан шинакли қалин ва баланд деворлар билан гир айлантириб ўралган. Саройнинг олдида ҳўжаликка оид 12 хона бўлиб, уларда ҳеч қандай безаклар учрамайди. Девор бўйлаб бурж ва дарвозалар қурилган саройга шарқ томондаги пандусдан кирилади. Пандуснинг охири турли ўсимликларга ўхшатиб нафис нақшлар билан безатилган тор йўлакда тугайди. Сарой шу қадар баланд қилиб қурилганки, аҳоли яшайдиган ҳовлилар ундан жуда кичкина бўлиб кўринади.

Шубҳасиз, Тупроққалъядан топилган жуда бой археологик материалларни пухта ўрганиб, хоразмликларнинг III—IV асрлардаги давлатчилик сиёсати, шунингдек қишлоқ ҳўжалиги ва хунармандчилиги, ҳарбий тузум, маданияти ва ёзувини тўлақонли тасвирилаш мумкин.

Бутун Хоразмда шоҳларнинг тенги йўқ дабдабали қароргоҳи бўлган Тупроққалъя саройи номаълум сабабларга кўра IV асрга келиб ташландиқ ҳолга айланиб қолади. Шаҳардаги бўшлиқ эса VI асргача давом этади. Худди шу даврда Амударёning ўнг ва алоҳида сўл қирғогидаги сугориш иншоотлари ҳам инқизозга учрайди. Катта магистрал каналларнинг қўйи оқимидаги тармоқлари бутунлай ишдан чиқади. Қадимги Калтаминор сув тизими ниҳоят қисқариб кетади. Дарёning сўл қирғогидаги сугориладиган кўп ерлар чўлу биёбонга айланиб, анча шаҳарлар ҳувиллаб қолади.

Африғ сулоласи шундай  
катта тарихий ўзгариши-  
лар содир бўлган  
бир даврга



*Тупроққалъадаги  
յўт ибодатхонаси*




тўгри келади. Эрамизнинг IV асрларидан бошлаб шундай кучли воқеалар рўй берадики, натижада Хоразмнинг бутун хўжалик ва жамият тузуми, майший ва сиёсий аҳволи кескин равишида ўзгара бошлайди. Бу ўзгаришлар янги хилдаги истеҳком ва ҳовлиларнинг пайдо бўлишида яққол кўринади.

Кудратли қальялар соясида мустаҳкам қурилмаган истеҳкомлар ўрнига далалар ўртасида дехқонларнинг ўзбошимчалик билан мустаҳкамлаб қурган қўргончалари пайдо бўлади.

Бу қўргончалар билан бир қаторда зодагонлар яшайдиган ваҳимали янги қасрлар ҳам қад кўтаради. Воҳадаги дабдабали антик шаҳарлар тушкунликка учраб, жамият ҳаёти шаҳардан қишлоққа ўта бошлайди.

Шубҳасиз, Хоразм воҳасида рўй берәётган бу муҳим ижтимоий-иқтисодий жараён Ўтра Осиёда авж олиб борган сиёсий воқеалар билан бевосита боғлиқ бўлган. Ажойиб тарихий обида Тупроққалъанинг қисқа мuddатда, яъни бир неча асрда тикланиб, кейин инқиrozга учраши минтақадаги жиддий ўзгаришларнинг ёрқин ифодаси эди.

С.П.Толстовнинг таърифлашича, Тупроққалъа шаҳари ва ундаги саройнинг қурилиши ҳам даставвал муҳим сиёсий аҳамиятга эга бўлган воқеа ҳисобланади. Чунки бу иншоотнинг бунёд этилиши тарихда «Хоразм эра»сини бошлаб берган воқеа, деб юксак баҳоланади. Сабаби, эрамиздан аввалги II асрда дашт қабилаларининг босиб келиши натижасида қудратли Грек-Бақтрия давлати емирилиб, Парфия инқиrozга учраб барбод бўла бошлайди. «Кангюй» маданияти-



Тупроққалъа

нинг тубанликка юз тутиши, Амударё этакларида ягона Хоразм давлатининг тикланиши ва кучайиши янги сулоланинг пайдо бўлиши билан боғлиқ эканлигини намоён қиласди. Балки афригийлар сулоласи сиёвушийлар анъаналарини давом эттириб, ўз кучини кўрсатиш учун ҳашаматли Тупроққалъани бунёд қилгандир. Янги сулоланинг қуи Амударё воҳасида пайдо бўлиб, хоразмшоҳлар билан боғлиқ, янги йил ҳисобининг, Беруний кўрсатганидек, ўша даврдан бошланиши ҳам бежиз бўлмагандир. Чунки мазкур шаҳар-қалъанинг яратилиши Хоразм давлатининг қайтадан тикланиб, мустақилликка эришганлигининг рамзи сифатида афригийлар таҳтининг мустаҳкамлиги ва унинг қадимий тарихий ҳамда мафкуравий анъаналари билан боғлиқлигини ифода қилиши мумкин.

Тадқиқотчилар орасида Тупроққалъа мамлакатнинг пойтахти бўлганми ёки пойтахт бошқа шаҳар ҳисобланганми, деган баҳслар ҳозиргача давом этади.

Кўпчилик олимлар, жумладан С.П.Толстовнинг ўзи ҳам, мазкур обидани пойтахт билан боғлиқ, давлатни бошқариб турган подшоҳлар қароргоҳи деб ҳисоблайдилар. Қурилиш услубига қараганда ҳашаматли сарой қасри билан шаҳар кварталлари эгаллаган ҳудуд сатҳи таҳминан бир хил майдонга teng (13 ва 10 гектар). Эҳтимол бу ерда истиқомат қилувчилар асосан зодагонлар, хизматкорлар ва қўриқловчи аскарлар бўлган. Шаҳар ҳудудида бозор ва ҳунармандлар расаталарининг йўқлиги ҳам мазкур фикрни қувватлайди. Асли сарой биноси, унда топилган ёзма ҳужжатларнинг гувоҳлик беришича, Тупроққалъа шубҳасиз қулларнинг оғир меҳнати, меъморларнинг зўр маҳорати, ижодкорларнинг нафис санъати мужассамланган антик Хоразм ижтимоий тузуми ва давлатчилигини ифодаловчи муқаддас ноёб обида ҳисобланади.

Тупроққалъани мамлакатнинг бош шаҳри, яъни пойтахти бўлмасдан, балки сулола ҳукмдорларининг марказий қароргоҳи вазифасини бажарганлигини тасдиқловчи қўшни Парфия подшоҳларининг истеҳкоми, қўшк-саройи ва ибодат маркази ҳисобланган Эски Ниса билан қиёс қиласа бўлади. Аммо хоразмшоҳлар қароргоҳи ўзининг тузилиши, қурилиш услуби ва аҳамияти жиҳатидан Нисадан ажралиб туради. С. П. Толстовнинг фикрича, Тупроққалъа меъморчилиги кўп жиҳатдан Месопотамия иншоотларига ўхшаб кетади. Қалъада уйлар сатҳидан аńча баланд кўтарилиб қурилган сарой бинолари муқаддас тоғни ифодаловчи қадимий шарқ иншоотларини эслатади.

Бунга қурилиш услубидаги қадимий Бобил ва Ассирия билан хоразмликларнинг баъзи меъморчилик шаклларининг умумийлиги мисол бўла олади.

Тарихий-археологик маълумотларга қараганда, араб истилоси арафасида Хоразм жиддий тангликни бошдан кечирмоқда эди. Бу пайтда Тупроққалъя атрофидаги шаҳарлар таназзулга юз тутди ва ҳаёт сўниб борди. Сугориладиган экин майдонлари кескин қисқариб кетди, хунармандчилик, ишлаб чиқариш касодга учради. Ички бўхрон туфайли заифлашган Хоразм давлати ўз худудига кириб келиб, воҳада ўтроқ бўлиб қолган ярим кўчманчи ва кўчманчи қабилалар сиқувига дош беролмади. Бу омиларнинг барчаси хоразмликларнинг ижтимоий ва этник қиёфасига ўз таъсирини ўтказди.

Тупроққалъя ва унинг атрофидаги мудофаа деворларида VI аср охиirlаригача ҳаёт давом этган. Кейинги йилларда қалъанинг янада янги сирлари очилмоқда.

## ЖЕЛДИКҚАЛЪЯ – МАЙИН ШАМОЛЛИ ҚАЛЪЯ

Минг йилликлар давомида ҳозирги биргина Элликқалъя тумани худудида 100 дан ортиқ мудофаага мўлжалланган қўхна қалъалар бўлган бўлса, бугунги кунга келиб 20 дан зиёдроқ ана шу эски қалъалар ҳаробаси сақланиб қолган холос.

С.П.Толстов Тупроққалъя ва Желдикқалъя каби қадимий биноларнинг пойdevори қум-фишт билан тўлдириб қурилганлиги, бу эса ўз навбатида



бинони нам ва нам олиб келадиган туз таъсиридан сақлашда қадимги хоразмликларга хос усул эканлигини таъкидлайди.

Тумандаги қалъаларнинг энг қадимгиси ва энг катталаридан бирини одамлар «Елликқалъя» деб аташади. Уни профессор С. П. Толстов ўзининг «Қадимги Хоразм», «Қадимги Хоразм маданиятини излаб» номли асарларида «Желдикқалъя» номи билан тилга олади. «Желдикқалъя» сўзи эса «Елликқалъя» сўзининг ҳозирги қозоқ тилидаги талаффуз қилинишидир. Ҳар иккovi ҳам «Шабадали қалъя», «Майн шамолли қалъя» деган маънони англатади.

Худудда ҳозиргача сақланиб қолган Желдикқалъя ёдгорлигида милоднинг III—IV асрларида одамлар истиқомат қилганлигини, қўрғон Хоразмнинг ўша даврдаги хоразмшоҳлар қароргоҳи бўлган Тупроққалъя билан тенгдош эканлигини Ўзбекистон Республикаси Фанлар академиясининг Хоразм археология ва этнография илмий экспедицияси аниқлаб берган.

## ҚАВАТҚАЛЪЯ ХОРАЗМНИНГ ЮКСАЛГАН ДАВРИ ЁДГОРЛИГИ

Элликқалъя тумани маркази — Бўстон шаҳрининг гарбида Қаватқалъя ҳаробалари жойлашган. Қалъада XI—XIII асрларда ҳаёт гуллабяншаган. Унда Ўрта асрларнинг қишлоқ йирик феодал саройи курилган.

Эски Говхўра каналининг гарбида жойлашган, атрофларини қум барханлари ўраган қўрғон майдони 110 x 115 метр бўлиб, ҳар бир деворини беш минора ҳимоя қиласи. Қалъа деворларининг баландлиги 10 метр бўлиб, ҳозиргача 8 метр баландликдаги девори сақланиб қолган. Миноранинг пастки қисми 13 x 10,5 метрни ташкил этади.





Қаватқалъага бевосита туташиб кетувчи 8 квадрат километрли тақирда 90 дан ортиқ дехқон қўргонлари бўлганлиги аниқланган. Агар Қаватқалъа рустагини афритийлар давридаги Бургутқалъа рустаги билан (бу ерда 35 километр квадрат майдонда 100 тача қўргон жойлашган) аҳолининг ўрнашганлик даражаси солиштирилса, аҳоли зичлиги тахминан тўрт баробар ошганлиги кўриниб турибди.

Қаватқалъа мажмусининг таҳлили XII—XIII асрларда Хоразм жамиятининг тузилиши қандай бўлганлиги тўғрисида мукаммал тасаввур беради. Қаватқалъа рустагининг тортилиш маркази кичикроқ қалъа — шаҳар бўлиб, унинг ичидаги девори сиртидаги сувоққа ўйиб хилма-хил нақшлар туширилган сарой биноси топилган. Қалъани гир айланиб чиқадиган канал ёқасининг у ер — бу ерида ўша даврага хос шаклдаги тўртта қўргон бўлган. Улар — тўғри тўртбурчак шаклдаги равоғи ташқарига туртиб чиқсан, арки ёй ўқига ўхшаш, бурчакларида қиррали декоратив кичик бурjlари бор квадрат шаклдаги истеҳкомлар бўлган. Қўргонларнинг донжони йўқ, тўртбурчак шаклдаги турар жойлар девор ёқалаб жойлашган, ичкаридаги ҳовлининг саҳни кенг бўлган. Қўргоннинг деворлари юпқа бўлиб, мудофаа жиҳатидан айтарли аҳамиятга эга эмас.

Мўгулларнинг Хоразмга ҳужуми туфайли хоразмшоҳлар давлати ўсишдан тўхтайди. Хоразм маданияти топтаб ташланади. Қаватқалъа воҳасидаги қад кўтарган қалъалар вайрон қилинади, аҳолисининг кўпчилиги қириб ташланиб, ёшлар Мўгулистанга қул сифатида олиб кетилади.

## БУРГУТҚАЛЪА — УЗОҚ МОЗИЙДАН ДАРАК БЕРАДИ


Бургутқалъа ҳаробалари эрамиздан аввалги I асрда одамлар яшайдиган 200 x 150 метрлик ҳажмдаги қўргон бўлганлиги аниқланган. Бизгача етиб келган Бургутқалъа ҳаробалари VII—VIII асрлардан бошлаб қайта қурилган қалъа-қўргон ҳисобланади. Қалъа тўрт томони баланд истеҳкомли девор билан ўраб олинган. Қўргон майдонини (100 x 160 м) ўраб турувчи деворнинг баландлиги 10 метр бўлиб, унинг пастки қисми қалинлиги 2,5 метр келади.

Қўргон деворига ёпиштирилиб ташқарига гиштдан вал шаклида қурилган минора иншоотининг юқори қавати пахса девордан бўлиб, мудофааининг мустаҳкам бўлишини кўзлаб қилинганлигини кўрса-

тади. Минорадаги навбатчи соқчиларнинг мўлжалга олиш тешиклари кенглиги 20 сантиметр бўлиб, баландлиги 30 сантиметрни ташкил этса-да, ташқаридан 1 метр кўриниш беради. Миноранинг пастки қаватидаги нишонга олиш жойи қатъий тартибда паралель ишланган.

Бу эса кузатув пунктларида турган ҳимоячиларнинг бостириб келётган душманга аниқ зарба беришларини таъминлаш билан бирга қаердан туриб қаршилик кўрсатаётганлигини сездирмаслик мақсадида ишланганлигидан далолат беради.

Бургутқалъада қўшимча паст тўсиқ деворларининг бўлганлиги қадимги ҳарбий санъатдаги ютуқлардан фойдаланишининг кўринишидир. Паст тўсиқ девор уруш пайтида девор бузувчи машиналарнинг ҳужумидан қалъа аҳолисини ҳимоя қилишга мўлжалланган. Тарихий манбаларнинг гувоҳлик беришича, хоразмшоҳ Чагон укаси Хуршод турган Бургутқалъага қарши уруш очади. Хуршод бошчилигига бургутқалъаликлар шоҳ Чагон қўшинларини енгигб, воҳадан ва Хоразмдан суриб ташлайдилар. Ўз укасининг қўшинларидан енгилган шоҳ Чагон номардлик қилиб, Хоразмни ўзларига қарам қилиб олишга шай турган араб босқинчиларига Хуршодни енгигб олишда ёрдам сўраб мурожаат қиласди. Натижада араб қўшинлари 712 йилда Хоразмнинг пойтахти Катни, кейин Бургутқалъа ва унинг атрофидаги аҳоли пунктларини узоқ курашлардан кейин босиб олади ва қаршилик кўрсатганлиги учун аҳолини қириб ташлайди. Натижада Бургутқалъада ҳаёт сўнади. Қалъа атрофида бу қирғиндан омон қолган аҳоли яна бир асрга яқин ҳаёт кечирган. Араблар истилосидан анча кейин, яъни X асрда Бургутқалъа ва унинг ат-



*Бургутқалъа*



рофида турли тўқнашувлар ҳамда сувсизлик оқибатида ҳаёт тугайди. Одамлар сувга қулай жойларга кўчиб кетадилар.

## ЎЙҚАЛЪА ЁДГОРЛИГИ

Ҳудудда жойлашган қалья ва қўрғонлар орасида ҳарбий мудофаага мўлжалланганлардан яна бири Ўйқалъа ёдгорлиги бўлиб, у Эллик-қалья туманидаги “Гулистон” овулининг Ўрдахона кўли жанубий этагида жойлашган.

Ўйқалъа деворлари унча қалин бўлмаса ҳам мустаҳкам истеҳкомга эга. Деворларининг юқори қисми 1 метр қалинликда бўлиб, антик даврга оид бино қолдиқлари қальяга мустаҳкам устун бўлиб хизмат қилиган. Бу — ўша даврда девор бузувчи машиналардан қальяни ҳимоя қилишда муҳим восита бўлганлигини таъкидлаб ўтиш ўринлиdir.

Қўрғонни асосан турли тарафдан ўраб турган уч минора ҳимоя қиласи. Деворларнинг баландлиги 7—8 метр атрофида бўлиб, юқоридаги қисмida душман ҳужумига йўл қўймаслик чора-тадбирлари кўрилган. Қалья ҳимоячилари миноралар орасидаги кўпиррикчалардан фойдаланиб, биринчисидан иккинчисига ўтганлар. Ўйқалъанинг деворлари тўғри бурчакли, олдинга туртиб чиққан иншоотга эга, ундаги жуда кўп зинапоячалар мудофаани янада кучайтиришга хизмат қилиган.

Ўйқалъада VII—VIII асрларда одамлар истиқомат қилган. Бу давр воҳада фуқаролар уруши қизиганлиги билан характерланади.

Ўйқалаъанинг минораларида навбатчи соқчилар доимо жанговар ҳолатда шай



У/НК - Ч23

туриб, қалъани ҳимоя қилғанлар. Шунингдек, қалъа ҳимоячилари ҳам кичик құрғонларда яшайдиган дәхқонларни бүйсундириш учун вақти-вақти билан урушлар олиб борғанлар.

Үйқалъанинг ҳаробага айланишига биринчи навбатда араб құшин-ларининг аёвсиз олиб борған қирғинбарат урушлари сабаб бўлган.

## КАТТА ҚИРҚҚИЗҚАЛЬА СТРАТЕГИК МУДОФААГА ЭГА

Бу қалъа милоддан аввалги IV—III асрларда мавжуд бўлиб, унда аҳоли истиқомат қилған. Кичик Қирққизқалъа ҳам Катта Қирққизқалъа билан тенгдош. С.П.Толстовнинг таъкидлашича, милоднинг V—VI асрларида Катта Қирққизқалъада одамлар гавжум яшаган. Қалъа VII—VIII асрларда истеҳкомланган ва тўрт томони мустаҳкам ғишт билан девор қилиб ўралган. Деворга тулаш икки қаватли минораларда қалъани душмандан ҳимоя қилишга мўлжалланган ўқ отиш тешикчалари ишланган.

Қалъа қадимги даврдагидек ҳозир ҳам экин майдонлари билан Қизилкум саҳроси чегарасида жойлашган. Маҳаллий аҳоли Кичик Қирққизқалъани Қул қалъа ҳам деб атайди. Айтишларига қараганда, Кичик Қирққизқалъада шу воҳадаги энг катта қул бозори бўлган. Шунинг учун ҳам бу қалъани ҳозиргача Қул қалъа деб атаб келмоқдалар. Бу қалъа ҳам шу даврдаги бошқа қалъалар каби стратегик мудофаага мўлжаллаб қурилган.

Қалъадан 30—50 метр жанубда кўп хонали бино бўлиб, ундан темир қолдиги, шлак уюми, темир эритиладиган ўчоқ топилган.

1984 йилда Катта Қирққизқалъя яқинидаги тақирилекдан тангаларга лиқ тўла кўза топилди.  
Тангалардан биттасигина чиrimай,



*Katta Kirqkizqala*



қорайган ҳолатда бизгача етиб келган. Танганинг чап томонига Сиёвушнинг расми туширилган. Сиёвуш мингган отнинг олд томонида Сиёвуш томонга қайрилиб қараганча дуторга ўхшаш мусиқа асбобида берилиб куй чалаётган ёш санъаткор аёл тасвирланган.

Ўрта Осиёда (Марв, Термиз ва бошқа шаҳарларда) қўпгина қалъалар туркйча ёки форсча (Чилдухтарон) номи билан “Қирқ қиз” деб юритилади. Янги эранинг I—VI асрларига мансуб бўлган Қирқ-қиз ҳаробалари халқ ўртасида кенг тарқалган малика ва унинг қирқта дугонаси тўғрисидаги афсоналар билан боғлиқ. Бу афсоналарда гоҳ жанговар қизлар сифатида (қорақалпоқларнинг бир достонида), гоҳ тарки дунё қилган қувфинди қизлар сифатида (қирғизларнинг бир афсонасида), гоҳо қирғиз халқининг келиб чиқиши билан боғлиқ ҳолда (“қирғиз — қирқ қиз”) қирғиз ҳалқининг энг биринчи (бош) онаси сифатида таърифланади.

## АЁЗҚАЛЬА – ХУДУДДАГИ ЭНГ ЙИРИК МАЖМУА

Милоднинг I асри охири ва II асрларида Хоразм Кушонлар салтанати таркибига кирган. Бу даврга оид тарихий ёдгорликлар орасида Аёзқалъа мажмуаси ҳаробалари алоҳида кўзга ташланади. Аёзқалъа ёдгорлиги Элликқалъа туманинг шимолий-гарбидаги, Султон Увайс тоғ тизмалари этагининг шарқий қисмидаги жойлашган. Бу уч қалъадан иборат мажмуанинг умумий номи Аёзқалъа деб аталади.

Аёзқалъа-1 қўрғони 60 метр баланд тоғ тепасидаги текисликда курилган бўлиб, пастак гишт девор билан ўраб олинган катта қўрғондан иборатdir. Қўрғон 9 минг квадрат метр майдонни эгаллади. Аёзқалъа-1 шаҳар ҳам эмас, қишлоқ ҳам эмас, балки том маънодаги




Аёзқалъа мудофаа мажмуаси

аскарлар туралиган қалъа бўлган. Унда ўша даврдаги Хоразм давлатининг қўшини жойлашган. Бу қўшин салтанатнинг шимолий чегараси бир қисмини назорат қилиб турган. Хитой солномачиларининг берган маълумотига қараганда, у тўғри бўлса, хитойликларнинг Баънчао қўмондонлигидаги қўшинлари Кангюй (Хоразм) давлатининг жуда ичкариси - Орол дengизигача етиб борган. Бунда сўзсиз Аёзқалъа ва бошқа жойлардаги қўшинлар ҳам душманга қарши ҳал қилувчи жанг олиб борганлар.

Аёзқалъа-1 кўргонининг шимолий-гарбий бурчаги яқинидаги Аёзқалъа тепалигининг этагида, 30 метр баландликда қад кутариб турган конуссимон қоя тепасида Аёзқалъа-2 нинг ҳаробалари жойлашган.

Бир ривоятга қараганда, Хоразмда кекса подшо ўлиб, ўрнига янги подшо сайлаш учун кўп минг кишилик йифин бўлиди. Унда фақат баҳт қуши ҳисобланган Лочин кимнинг бошига қўнса, шу подшо булиши эълон қилинган. Бу воқеани эшитган Аёз ҳам подшо сайлаш майдонига томоша кўриш учун борган экан, бирдан унинг бошига баҳт қуши келиб қўнибди. Подшоликни умид қилиб турган кўп кишилар кулдан ҳам подшо бўладими, Аёз кечагина қулликдан озод бўлган, деб баҳт қушини олиб кетиб, яна қайта учирсалар, у яна учиб келиб Аёзнинг бошига қўнибди. Хуллас, баҳт қуши неча марта қайта учирилган бўлса, у шунча марта учиб келиб Аёзнинг бошига қўнаверган. Халойиқ Аёзни подшо деб эълон қилган. Аёзхон қоя устига қалъа қурдириб, ўз тахтини ҳам шу қалъага олиб келибди. У қуллик давридаги аҳволим эсдан чиқмасин, деб тахтнинг рўпарасида, кўзи тушиб туралиган жойга ўз оёқ кийими — чорифини осиб қўйибди.

Аёзхон кўп йиллар давомида мамлакатни адолат билан бошқарган. Хоразмда «Аёзхон қуллик давридаги чорифини унумтмаган» деган ибора ўша даврдан қолган экан. Аёзқалъа мажмуаси ҳозирда ҳам



Аёзқалъа-1



баланд төф текислиги устида виқор билан савлат тўкиб, кўпгина хорижлик сайёҳларнинг диққатини ўзига тортиб турибди.



Аязқалъа—2

## ҚЎЙҚИРИЛГАНҚАЛЪА ЗАМОНАСИННИНГ РАСАДХОНАСИ БЎЛГАН

Қўйқирилганқалъа эрамиздан аввалги IV асрда қурилган бўлиб, унинг ички айланаси 42 метр, ташқи айланаси 87,5 метр ва баландлиги 8 метрни ташкил этади. Ташқи девор бўйлаб бир-биридан маълум масофа узоқликда жойлашган 9 та бурж қад кўтариб турган.

Бу қалъа қурилиши меъморчилиги жиҳатидан Ўрта Осиёдаги энг қадимги қалъалардан ҳисобланади. Қалъанинг юмaloқ марказий минарасининг баландлиги 8 метрча бўлган. Қуий қаватдаги бинолар деворнинг томга туташ бурчак қисмида жойлашган дешралар орқали ёритилган. Дераза токчаларининг чукурлиги 7 метрга етган. Чунки, умумий айланаси 42 метрли минарани ўраб олган мустаҳкам девор жуда қалин бўлган. Марказда жойлашган бинолар



Қўйқирилган  
қалъа

ташқаридан 15 метрдан ортиқроқ масофада мудофаа мақсадларида қурилган 9 та минорали айланы девор билан ўраб олинган.

С.П.Толстов қальгадаги астрономик кузатищларга мұлжалланған беш деразали хонани синчиклаб үрганиб ва айрим усқуна қолдиқла-рига қараб, бу жойда расадхона (абсерватория) бўлган деган далилларни келтиради.

Демак, Қўйқирилганқалъада дунёнинг бошқа жойларига нисбатан кўп илгари расадхона пайдо бўлиб, коинот фани ривожланган. Расадхона фаолиятида арифметика, математика, геометрия, тригонометрия, физика, табиат, астрономия каби фанларга таяниши бизга маълум. Демак, Қўйқирилганқалъада милоддан аввалигі IV асрдаёк расадхона бўлганлигига асосланиб, шу даврда юқорида номлари қайд этилган фанлар кенг ривожланган, деб айта оламиз.

Қалъанинг асосан юқори қатламидан жуда кўп темир қурол ва буюмлар, темир ӯроқ, бир қанча пичоқ, темир илгак, соқол юладиган мўйчанак, ўқ ёй учлари топилган. Академик Я.Фуломовнинг қўйдаги тарихий маълумотларига тўхталиш мақсадга мувофиқдир. “Хоразм подшоси Фратапен Зариаспуга Искандар (Александр Македонский) ҳузурига ахамонийлар ҳокими сифатида эмас, балки Искандар ва унинг ворислари даврида ўз мустақиллигини сақлаб



*Кўйқирилганқалъанинг туман  
тарих ва археология музейидаги макети*



қолган Хоразм подшоси сифатида борган, ўзини суворийларнинг қўшини деб атаган. Фратапен Искандарга, агар у шу кўрсатилган қўшинларга юриш қўлмоқчи ва Эвксин дengизи бўйida яшовчи қабилаларни бўйсундирмоқчи бўлса, унга Фратапен бу юришда йўл кўрсатмоқчи ва унинг қўшинларини озиқ-овқат билан таъминламоқчи эканлиги-ни айтади. Шундан кейин Искандар Фратапенни мақтаб, у билан дўстлашиб, ҳарбий иттифоқ ўрнатган. Фратапенни Искандар Зулқарнайн ҳузурига боришидан асосий мақсади унинг кейинги юришлари ҳақидаги режасини билиш, агар Хоразм томонга юрмоқчи бўлса, унга қарши пухта тайёргарлик қўриш бўлган”.

Хоразм давлати пайдо бўлишининг дастлабки босқичида Қўйқирилганқалъа унинг мансабдорлари, лашкарбошилари ва уломалари яшайдиган марказ бўлиб хизмат қилганлиги қўриниб турибди. Эрамиздан аввалги IV асрдаёқ Хоразм давлати анча тараққий қилган. Қўйқирилганқалъа шу давлатнинг илмий маркази бўлган, деб хулоса чиқариш мумкин.



Қалъанинг самалётдан кўриниши

## ГУЛДУРСУН – ГУЛИСТОН БЎЛГАН ҚАЛЬА

Гулдурсун қалъаси эрамиздан аввалги IV—III асрларда қурилган бўлиб, унда XIII асрларгача ҳаёт давом этган.

Катта Гулдурсун қалъаси қўш девор билан ўраб олинган нотўғри тўртбурчак (280 x 230 м.) шаклидаги қўш пахсали антик қалъа бўлиб, ташқи деворларида найзасимон шинаклари бўлган. Қалъага кириш дарвозаси жанубий-шарқ томонидан бўлиб, тўғри бурчакли мудофаа иншооти билан ўралган. Яъни, бу ерда қадимиги ҳарбий мудофаа иншоотлари қурилиши услуби сақланиб қолган.

Душман дарвозадан бирданига бостириб кириши mushkul бўлган. Улар дарвозанинг ҳимоя қилинмаган томонидан кириб, ўнг томонга юриши ва чап томонга қайрилиб, ичкарига кириши билан қалъа

ҳимоячилари томонидан ўққа тутилган. Дарвоза олдидағи йўлакнинг антик лабиринти ҳам ўрта асрларда қайта қурилган.

1220 йили мўғул босқинчилари Хоразмга бостириб келганида Амударёning ўнг соҳилидаги Хоразм давлати ҳокимлиги жойлашган Гулдурсун қалъасида мўғулларга қарши қонли уруш узоқ давом этади. Яъни, Гулдурсун шу даврда воҳамиздаги мўғул босқинчиларига жуда кўп муддат қаршилик қўрсатган энг қудратли ва мустаҳкам қалъа бўлган. Мўғуллар бу қалъани узоқ вақт қамал қилиб, унинг халқини шафқатсиз қириб ташлаганлар, қалъага ўт қўйганлар. Билимли ва хунарманд кишиларни эса ҳайдаб олиб кетишган. Мўғул босқинчилиги туфайли гуллаб-яшнаб турган Гулдурсун вайронага айланиб қолган. Бироқ унинг атрофида XIV—XV асрларгача ҳаёт давом этган.

Гулдурсуннинг ҳашаматли ҳаробалари тўғрисида сон-саноқсиз афсона ва ривоятлар тўқилган. Яқин-яқинларгача ҳалқ ўртасида “бу ерга қаргиш теккан, қалъанинг остида яширин лаҳм бор, уни аждаҳо қўриқлаб туради, кимки Гулдурсуннинг битмас-туганмас хазиналарини топишга қасд қиласа, ҳалок бўлади”, деган тушунчалар бор эди.

Шу ерлик ёш қароқалпоқ олими Ҳ.Кўжиров Гулдурсун тўғрисида болалигидан эшитган ривоятни шундай эслайди:

—Кексаларнинг сўзига қараганда, Гулдурсун бир замонлар “Гулистон” деб аталган экан. Бу жой ер-суви мўл, гуллаб-яшнаган бой шаҳар экан. Шаҳарни қари бир подшо бошқариб, унинг Гулдурсун исмли гўзал қизи бор экан. Кунлардан бир куни шаҳарнинг бошига кулфат тушибди: саҳродан келган босқинчи қалмиқ галалари ўз йўлида учраган ҳамма нарсани босиб-янчиб, ниҳоят, шаҳарга яқинлашибди. Қалмиқлар гуллаб-яшнаган дала ва боғларни ер билан яксон этиб, сўнг шаҳарга ҳужум қилибди. Шаҳар аҳлининг мардонавор мудофаасига учраган фаним кучи етмагач, уни қамал этибди. Шу тариқа ойлар ўтибди. Озиқ-овқат захиралари тугаб, одамлар кўчаларда ўла бошлабди. Сафлари сийраклашиб қолган шаҳар ҳимоячилари қуролларини қўлларида зўрға ушлаб турар эканлар. Подшо шунда ўзининг амалдор ва лашкарбошиларини маслаҳатга чақирибди. Буларнинг ичидаги бир одам топилиб, у сўнгги најот чорасини синаб кўришни таклиф қилибди. Бу жуда айёrona ўйланган режа экан. Қамалда қолган гулистонликлар бир неча хўқиз ичидан энг семизини маҳфий йўл билан саройга келтириб, уни подшо омборидаги сўнгги буғдой билан боқишибди ва шаҳардан ташқарига чиқариб юборишибди.



Фақат қамалдагилар эмас, балки қамал қилғанлар ҳам очликдан силласи қуриб, азоб чекмоқда экан. Қалмиқлар бир неча ойлик қамал давомида озиқ-овқат захирасини еб битирган эди. Уларнинг қароргоҳида қамалдан воз кечиш тўғрисида гап-сўзлар бошланибди. Оч қалмиқлар шаҳар ичкарисидан қочиб чиқсан ҳўқизни тутиб олиб, сўйишса, унинг ошқозони сара буёдой билан тўла эканлигини кўриб, саросимага тушишиб қолибди. “Агар улар молни шунчалик боқса, гамлаган озиқ-овқатлари беҳисоб эканда, қамал қилишдан фойда йўқ, шаҳарни олиб бўлмайди, очликдан қирилиб кетмасдан жўнаб қолайлик” дейишибди ғанимлар. Қалмиқларнинг лашкарбошилари ҳам шу фикрга келишибди.

Бироқ, подшо қизи Гулдурсуннинг хаёли бошқа нарсада экан. У узоқ ойлар давомида қалмиқларнинг мард, паҳлавон, ёш ва хушқомат лашкарбошиси — қалмиқ подшосининг ўелини девордан кузатиб юрар экан. Қизнинг қалбida халқининг душманлари йўлбошчи сига нисбатан чексиз эҳтирос алганга олибди. У қамалдагиларнинг ҳийласи иш берганини, юк ортилган түяларнинг бўкиришини, қалмиқларнинг ўтовлари бирин-кетин йиғиширилаётганини кўриб, бир неча соатдан кейин уларнинг бу ерда қолмаслигига, улар билан бирга гўзал шаҳзода ҳам абадий кетишига кўзи етгач, инсон номига номуносиб иш тутибди: ўзининг содиқ канизагидан қалмиқ баҳодирига хат бериб юборибди. Хатда қиз йигитга бўлган муҳаббатини изҳор қилиб, гулистонликларнинг сирини очиб берибди. “Яна бир кун кут, — деб ёзибди у, — шаҳарнинг таслим бўлишини ўз қўзинг билан кўрасан”.

Қалмиқлар түялардан юкларни ерга туширишибди, тунда қароргоҳ атрофида яна сон-саноқсиз гулханлар ёқилибди. Тонг отиши билан гулистонликлар душман шаҳарга яна ҳам яқинлашиб келганликларини кўрибди. Ҳийла иш бермаганини кўргач, умидсизликка тушган ва очликдан силласи қуриган шаҳар аҳли таслим бўлибди.



Катта Гулдурсунқалъа

Шаҳар душман томонидан таланиб, ёндирилибди, аҳолининг бир қисми қириб ташланибди, қолганларини эса қул қилиб олиб кетишибди. Сотқин Гулдурсунни шаҳзоданинг олдига келтиришибди. Шаҳзода унга қараб шундай дебди: «Ватанинг душманига бўлган номуносиб эҳтирос туфайли ҳалқига ва ўз отасига хиёнат қилган экан, яна бошқа бирор унинг ҳирсини уйғотса, менга вафо қиласиди? Уни ёввойи айғирларнинг думига боғланг, токи бундан кейин ҳеч кимга хиёнат қила олмасин».

От думига боғланган Гулдурсуннинг танаси парча-парча бўлиб, чўлу-биёбонларда қолиб кетибди. Хоиннинг қони тўкилган бу ер ҳаробага айланиб, энди Гулистон эмас, шу қизнинг номи билан Гулдурсун деб атала бошлабди.

Бу фожиали ривоятда тарихий ҳақиқат учқунлари яширинган. Ўрта Осиё ҳалқарининг ривоятларида XVII—XVIII асрларда Қозогистон ва Ўрта Осиёning шимолини ўт ва қилич кучи билан даҳшатга солган истилочилар — қалмиқлар, Чингизхон бошчилигидаги мўгуллар таърифланади. Гулдурсун шаҳри ва далаларида худди ана шу мўгуллар босқинчилиги туфайли яксон қилинган ҳаёт бизнинг давримизга келиб, қайтадан яшнамоқда.



Камта Гулдурсунқалъадаги лабиринтсизмон дарвоза



## ТЕШИКҚАЛЪА — ЖУДА НОЁБ ОБИДА

Тешикқалъа VI—VIII асрларга оид афригийлар даврининг кўшкидир. Қалъа Элликқалъа туманидаги “Қирққиз” овули ҳудудида жойлашган. Бу қалъа VI—VIII асрлар ҳаёти ва турмушини ифодаловчи муҳим тарихий обидалардан бири ҳисобланади.

Тешикқалъа қурилиши меъморчилигининг бошқа қалъаларга нисбатан ўзгача томони шундаки, унда айрим хоналар усти гумбаз қилиб бостирилган. Яъни, бу қалъа қурилишида янгича меъморчилик услублари қўлланила бошланган.

Тешикқалъа воҳасидаги барча аҳоли яшайдиган пунктларнинг мустаҳкамланганлиги ва моддий маданият қолдиқларининг жой жиҳатдан фарқ этиш ҳолати воҳанинг сиёсий ва иқтисодий жиҳатдан Ўрта Осиёнинг бошқа вилоятларидан ажralиб қолганлигини кўрсатади. Бундай аҳвол Хоразмнинг бошқа қалъаларида ҳам учрайди. Бу вазият араблар истилосидан сал олдинги даврға тўғри келади. Демак, бу даврдаги ички зиддиятлар, тўқнашувлар кучайиб ва ҳукмдорлар бир-бирлари билан келишмасдан ажralган ҳолда ҳаёт кечиришлари хоразмшоҳлар олий ҳокимиятининг заифлашувига олиб келган ҳамда Хоразмнинг араблар томонидан тез ва осон босиб олинишига сабаб бўлган дейишга асос бўлади.

Тешикқалъадаги ҳаёт қулдорлик тузумининг инқизозга учраши, феодализмнинг шаклланиши ва ривожланиши, араблар истилоси, зардустийлик ўрнига ислом динининг кириб келиши каби сиёсий воқеалар билан ҳам ифодаланади.

Юқоридагилардан кўриниб турибдики, Тешикқалъа воҳамиздаги жуда ноёб тарихий қалъалардан бири ҳисобланади.



Тешикқалъа

## ҚҮРҒОШИНҚАЛЬА

Бу маҳобатли қалъа эрамиздан аввалги IV—III асрларда бунёд этилган бўлиб, Султон Увайс тоғининг шимолий-шарқий тизмала-ри этагида, бугунги Элликқалъа туманининг “Қизилқум” овули фуқаролар йиғини худудида жойлашган.

Қалъанинг ҳажми 90 x 150 метр бўлиб, унинг тўрт бурчагида тўғри бурчакли миноралари (буржлари) бўлган.

Қўргошинқалъа воҳаси 67 гектар майдонни ташкил этиб, унинг жанубий-шарқ ва гарб томонида қишлоқ жойлашган. Қалъа атрофида 200 x 300 метр майдонда ҳар бирининг оралиги 3—4 метрдан кичик-кичик ариқлар қазилган бўлиб, бу ерда узумзорлар барпо этилган, деб тахмин қилинади.

VIII асрга келиб Қирққиз каналининг қуи қисмига сув келмай қолганлиги туфайли Қўргошинқалъа атрофида ҳаёт тўхтайди, одамлар сувга яқин жойларга, Амударё қўргоқларига кўчиб кетадилар.



## ҚИЗИЛҚАЛЪА — МУСТАҲКАМ ҲАРБИЙ ИСТЕҲКОМ

Қизилқалъа ёдгорлиги эрамизнинг II—III асрларида қурилган анча мустаҳкам қалъа бўлган. Бу қалъа баланд гишт пойдевор устига бунёд этилган бўлиб, ундаги тураржой бинолари каттагина ҳарбий горизонга мўлжалланган. Яъни, бу қалъа Хоразм подшолиги аскарлари яшайдиган ҳарбий казарма бўлган. Қалъанинг жанубий томонида



аскарлар машқ қиласидиган каттагина майдон ҳам мавжуд бўлиб, ўша даврга хос равишда жиҳозланган.

Умуман, Қизилқалъя стратегик жиҳатдан муҳим жойда қурилган. У давлат пойтахти бўлган Тупроққалъани ҳамда шу воҳа аҳолисини Султон Увайс тоги этагидан ўтадиган йўл орқали ва Амударё томонидан келадиган хавфдан қўриқлаб туришга мўлжаллаб қурилгандир. Ўрта асрларда бу қалъа қайта қурилган бўлса ҳам унинг меъморчилигига дастлабки қўриниши сақлаб қолинган.

Маҳаллий ҳалқларнинг айтишига қараганда, Қизилқалъадан Тупроққалъага борадиган ер ости йўли бўлган, дейишади. Лекин, бу йўл ҳозирча қазиб ўрганилмаган ва бу ҳақда аниқ маълумот йўқ.



Қизилқалъа

## ОЛИМНИНГ УШАЛМАГАН ОРЗУСИ

Сергей Павлович Толстов 1946 йил 4 июлда Москвада бўлиб, фанлар академиясига Хоразмда иш олиб бораётган экспедицияга доир: “Шу давргача номаълум бўлган 200 та қалъа сири очилди. Ўн бир минг квадрат метр майдонда, ер қаърида 15—20 минг йил ётган антропологик, археологик ашёвий далиллар ибтидоий жамоа, кулдорлик даври, қадимий Хоразм давлатининг пайдо бўлиши, юксалиши ва эмирилишига доир ашёвий топилмалар тарих фанида ян-



гилик бўлди. Қизилқум барханлари остида қолиб кетган, баландлиги йигирма беш метр бўлган Тупроқалъанинг исломгача бўлган даврда бунёд қилинганлиги аниқланди. Бу ердан катта қас, қурол-аслаҳа устахонаси, подшолар маскани, “ҳарбийлар зали”, “ғалаба ва тантаналар зали” каби икки юз хонали кошоналар топилди”, деб ҳисобот беради.

С.П.Толстовнинг Тўртқўл шаҳридан йигирма икки чақрим шимолий-шарқда жойлашган, астрономик кузатишларга мослаштирилган (эрэмиздан аввалги IV асрдаги) минорали Кўйқирилганқалъанинг истеҳкомли деворларини топгани ҳам бунда кўпгина тафсилотларни ойдинлаштириди. Чунки, мазкур қалъа геометрия, геодезия, астрономия фанларининг моҳир билимдонлари томонидан бунёд этилганлиги, ой, қуёш, кун, йил ҳисоблари, деҳқончилик маданияти белгилари билан ажralиб туради.

Тарихчи-олим С.П.Толстов дунё археология ва этнографиясига катта ҳисса қўшган тарих фанлари доктори, профессор, давлат мукофоти соҳиби, уч юздан кўпроқ илмий асарлар муаллифи эди. Антропология ва этнография фанлари халқаро уюшмасининг вице-президенти, Германия фанлар академияси мухбир аъзоси, Буюк Британия қироллиги антропология институти аъзоси ҳам бўлган. У Ўзбекистон, Тоҷикистон ва Қорақалпоғистонда хизмат кўрсатган фанарбоби каби унвонлар соҳиби ҳам эди.

Хоразмга бир умр boglaniб қолган археолог-олим мустаҳкам ирода, тарихни холис ва ҳаққоний ўрганиш билан умрини ўтказди. Профессор Николай Иванович Матвеевнинг Сергей Павлович Толстов оила аъзолари фикридан келиб чиқиб айтишича, 1976 йил 28 декабрда Москвада ҳаётдан кўз юмган археолог вафотидан сўнг ўзини Хоразм тупрогига кўмишларини тайинлаган. Афсуски, Хоразм тарихига, санъати ва маданиятига бир умр муҳаббат қўйган олимнинг истаги амалга ошмади. Унинг орзу ва армонлари рӯёбга чиқмай қолиб кетди.

Ўзбек давлатчилиги цивилизацияси тарихини, ўлкамиз маданиятини ҳаққоний очиб беришда бекёёс хизмат қилган археолог-олим Сергей Павлович Толстов таваллудининг 100 йиллиги 2007 йилда кенг нишонланади.



Бу кутлуг санага катта тайёргарлик кўрилмоқда. Элликқалъя туманида Ўзбекистон Фанлар академияси билан Австралиянинг Сидней университети ҳамкорликда “Жаҳон маданияти тарихи тизимида қадимий Хоразм цивилизациясининг ўрни” мавзусида халқаро симпозиум ўтказишга тараддуд кўрилаяпти.

## ХОТИМА ЎРНИДА

Ушбу кичик рисола тарихга қизиқувчиларга мўлжалланган бўлиб, ўлкамизда мавжуд кўплаб кўхна обидаларнинг яратилиши ва уларнинг тарихда тутган ўрни, мудофаа қўргонларининг аҳамияти ҳақида қисқача маълумот беради.

Рисолани яратишда буюк тарихчи-аллома Абу Райхон Берунийнинг “Қадимги халқлардан қолган ёдгорликлар”, С.П.Толстовнинг “Қадимги Хоразм маданиятини излаб”, “Древний Хорезм” ҳамда “Қадимги Окс ва Яксарт дельталари бўйлаб” асарларида баён этилган далил ва исботларга таянган ҳолда фикр юритилди.

Шунингдек, тарих фанлари доктори Исо Жабборовнинг “Буюк хоразмшоҳлар давлати”, академик Яҳё Фуломовнинг “Хоразмнинг сугориш тарихи” китобларидан фойдаланилди.

Ушбу рисоланинг ўқувчилари ўлкамизнинг қадимий тарихи, маданияти ва меъморчилик санъати билан яқиндан танишиш имконига эга бўлиш билан бирга, ҳарбий истеҳкомларнинг қурилиш услублари, уларнинг аҳамияти ҳақида ҳам кенг тушунча оладилар.

Мазкур китобчани яратишдан асосий мақсад — ёшларга Элликқалъя ҳудудида жойлашган қадимий ёдгорликларнинг қисқача тарихини баён қилиш ва уларни авайлаб-асраш зарурлигини, келгуси авлодга етказиш лозимлигини таъкидлашдан иборат. Зоро, собиқ иттифоқ даврида кўхна қалъалар қисмати ачинарли тус олиб, бу бебаҳо ёдгорликларга яқин жойлашган айрим хўжалик раҳбарларининг бепаровлиги, тарих олдилаги масъулиятсизлиги оқибатида уларнинг емирилишига, ҳатто кесаклари далага “ўғит” сифатида ишлатилишигача бориб етди.

Ҳолбуки, дунёнинг бошқа жойларида учрамайдиган бу ноёб ва бетакрор қалъаларнинг қолдигини, унинг ҳар бир қарич тупрогини кўзга суртиб авайлаб-асрашимиз, ўзимиздан кейин келадиган авлодга жуда бўлмаса, ҳозиргидек ҳолатда бус-бутун топширишимиз даркор.

## МУНДАРИЖА

Аждодлар мероси — келгуси авлодга.....	3
Кудратли қурғонлар давлати.....	5
Желдикқалъа — майнин шамолли қалъа.....	13
Қаватқалъа — Хоразмнинг юксалиш даври ёдгорлиги.....	14
Бургутқалъа узоқ мозийдан дарак беради.....	15
Ўйқалъа ёдгорлиги.....	17
Катта Қирқизқалъа стратегик мудофаага эга.....	18
Аёзқалъа — худуддаги энг йирик мажмуя.....	19
Қўйқирилганқалъа замонасиининг расадхонаси бўлган.....	21
Гулдурсун — Гулистон бўлган қалъа.....	23
Тешикқалъа — жуда ноёб обида.....	27
Қўрошинқалъа.....	28
Қизилқалъа — мустаҳкам ҳарбий истеҳком.....	28
Олимнинг ушалмаган орзуси.....	29
Хотима ўрнида.....	31



## Менгес Алламбергенов ҚАДИМИЙ МУДОФАА ҚЎРҒОНЛАРИ

Масъул мұхаррір Аминбай ОРТИҚБОЕВ

Мұхаррір А.Ирисбоеев

Рассом Ҳ.Худойбердиев

Техник мұхаррір Т.Смирнова

Саҳифаловчы А.Турсунов

Оригинал макет «Medianash» МЧЖ  
компьютер марказида тайёланди.

Босийлга 16.11.2007 йилда рухсат этилди.  
Бичими 60x84 1/16. Ҳажми 1,5 б.т. Нусхаси 1000.  
Буюргма №72. Шартнома №47/3.

Алишер Навоий номидаги  
Ўзбекистон Миллий кутубхонаси босмахонаси.  
Тошкент, Ҳ. Сулеймонова кўчаси, 33.